
PWYLLGOR PENSIYNAU ARBENNIG, 20.10.2016

Yn bresennol: Y Cyngorwyr: Stephen Churchman (Cadeirydd), Peredur Jenkins, Margaret Lyon (Cynrychiolydd Cyngor Bwrdeistref Sirol Conwy), W Tudor Owen, John P. Roberts a Sharon Warnes (Cadeirydd y Bwrdd Pensiynau)

Swyddogion:- Dafydd Edwards (Pennaeth Cyllid), Iwan Evans (Pennaeth Gwasanaethau Cyfreithiol), Nicholas Hopkins (Rheolwr Pensiynau), a Lowri Haf Evans (Swyddog Cefnogi Aelodau)

1. YMDDIHEURIADAU

Derbyniwyd ymddiheuriadau gan y Cyngorwyr Trevor Edwards, Seimon Glyn, Glyn Thomas a H. Eifion Jones (Cynrychiolydd Cyngor Sir Ynys Môn),

2. DATGAN BUDDIANT PERSONOL

Dim i'w nodi

3. MATERION BRYD

Dim i'w nodi

4. PWL BUDDSODDI CYMRU

- (a) Cyflwynwyd adroddiad gan y Pennaeth Cyllid yn hysbysu'r Aelodau o'r cynnydd oedd wedi ei wneud yn datblygu Pŵl Buddsoddi Cymru i reoli asedau buddsoddi wyth Cynllun Pensiwn Llywodraeth Lleol yng Nghymru ar sail gydweithredol. Nodwyd bod y prosiect wedi symud yn ei flaen ers cytuno sefydlu Cerbyd Buddsoddi Cyffredin yn Medi 2015, gyda gwybodaeth ychwanegol o'r broses wedi ei gyflwyno yn Chwefror 2016 (ar yr hyn oedd i'w gyflwyno i'r DCLG) ac yn ddiweddarach ym Mehefin 2016 (ar y cyflwyniad i'r Trysorlys a'r DCLG).
- (b) Amlygwyd bod angen adrodd yn gyson ar y bwriad o gyd-fuddsoddi gan rannu gwybodaeth gyfredol i sicrhau cysondeb. Adroddwyd bod gweinyddiaeth Cronfa Gwynedd yn aros yng Ngwynedd gyda'r buddsoddi yn digwydd yn rhannol gan Wynedd a'r Pŵl Buddsoddi Cymru. Cadarnhawyd y byddai'r Pwyllgor Pensiynau yn parhau i osod y Strategaeth Fuddsoddi ac yn penderfynu faint o asedau fydd angen eu rhoi mewn categorïau. Wedi cytuno ar y portffolio, bydd yr elfennau hynny yn cael eu trosglwyddo i'r rheolwr (operator) weithredu arnynt, gan benodi rheolwyr (cwmnïau) i fuddsoddi ar ran yr wyth cronfa yng Nghymru.
- (c) Ategwyd bod yr wyth cronfa yng Nghymru yn gyson a chytûn bod angen sefydlu Cydbwyllgor ar y Cyd fyddai'n gosod trefn llywodraethu i sicrhau atebolrwydd a herio penderfyniadau. I weithredu hyn, awgrymwyd bod un cynrychiolydd o bob un o'r wyth gronfa yn cael ei gynnwys ar y Cydbwyllgor yma.

Cyfeiriwyd at gynnwys yr adroddiad ynghyd a'r memorandwm o ddealltwriaeth (drafft) a oedd yn egluro sut fyddai'r drefn yn gweithredu yn y tymor byr ac i'r dyfodol.

- ch) Wrth ystyried y camau nesaf, eglurodd y Pennaeth Cyllid bydd adroddiad ffurfiol i'w gyflwyno i'r Cyngor Llawn ym Mawrth 2017 fydd yn argymhell i'r Cyngor addasu cyfansoddiad y Cyngor i'r dyfodol, fel bydd y Cydbwyllgor ar y Cyd yn cael rhywfaint o'r grym fu gan y Pwyllgor Pensiynau.
- (d) Cadarnhaodd y Pennaeth Gwasanaethau Cyfreithiol, wrth symud ymlaen i drefn ffurfiol o sefydlu Cydbwyllgor Cenedlaethol ar y Cyd, bod angen sefydlu camau cychwynol i ddechrau proses caffael ar gyfer trefn buddsoddi newydd. O ganlyniad, amlygwyd mai priodol oedd cael fframwaith llywodraethu glir. Nodwyd nad oedd y memorandwm o ddealltwriaeth yn clymu'r Cyngor yn gyfreithiol i'r broses, ond yn creu fframwaith i sicrhau mewnbwn Cadeiryddion a Phrif Swyddogion Cyllid i'r broses a chaniatáu i'r gwaith cychwynol ddechrau. Ychwanegwyd nad oedd gan y Cydbwyllgor hawliau i wneud penderfyniadau, dim ond hawl i argymhell a chefnogi'r broses gan roi cyfeiriad yn ôl yr angen.
- (dd) Amlygodd y Cadeirydd bod llawer o waith ychwanegol wedi cael ei wneud gan Adran Cyllid ac Adran Gyfreithiol Cyngor Gwynedd a diolchwyd i'r holl swyddogion oedd ynghlwm a'r gwaith hynny.

PENDERFYNWYD

- i. **bod y Pwyllgor yn nodi'r cynnydd yn natblygiad Pŵl Buddsoddi Cymru.**
- ii. **bod y Pwyllgor yn cymeradwyo'r Memorandwm o Ddealltwriaeth drafft.**
- iii. **bod y Pwyllgor yn dirprwyo hawl i'r Pennaeth Cyllid gytuno unrhyw newidiadau i'r Memorandwm o Ddealltwriaeth, mewn ymgynghoriad â'r Cadeirydd.**
- iv. **bod y Pwyllgor yn penodi y Cadeirydd, y Cynghorydd Stephen Churchman, i gynrychioli'r Pwyllgor ar y Grŵp Cadeiryddion ar y Cyd, neu'r Is Gadeirydd, y Cynghorydd Peredur Jenkins, yn absenoldeb y Cadeirydd.**

Dechreuodd y cyfarfod am 1pm a daeth i ben 1:20pm